



真實个快樂（北四縣腔）

記得讀高中个時節，看著報紙寫等五月雪个文章，僱心肝肚想麼个係五月雪呢？係哪位會落雪係無？仰恁生趣呢？

原來逐年四、五月个時節，開到滿山滿岫白白个油桐花就係五月雪，遠遠看過去榮榮滿山白雪雪个，實在當靚，歸徧山像堆了一層層个白雪，故所，分人安到五月雪。該央時，還無麼个人知五月雪，也無麼个人好看油桐花，盡惜僱个阿爸阿姆聽著僱想愛看白白个花，遽遽渡僱去，該年也係僱第一擺摺阿爸阿姆看油桐花。該時節哪有想著續下來每一年恩兜都定著會去看呢？一直到這下，既經七、八年了！就像係恩兜摺油桐花个約定共樣，逐年定著愛去一擺。這幾年，油桐花還係開到當鬧當靚，愛看油桐花个人也緊來緊多咧，喜歡油桐花个人愛記得趕在逐年四、五月个時節去欣賞喔！係講今年無看著，就愛等到明年正有哩啲！

逐年油桐花開个時節，新竹縣橫山鄉大山背該位，歸路歸山都看得著淦淦个油桐花，遠遠看過去，歸隻山頭像落雪樣仔，非常壯觀。恩兜逐擺下晝四點去，天時毋會忒熱也毋會忒涼，堵堵好當舒爽，駛車到大山背，在該食點心、散步、欣賞樹頂仰係跌落地泥頂个油桐花，無就大家坐在樹下打嘴鼓，嘻嘻哈哈，有講有笑，不時會有一點一點白白个花隨風慢慢仔跌下來，就像落雪樣仔，恁悠閒个景色，異浪漫个情景，分人心情一下仔就變到當好啲。

聽阿公講，頭擺日治時代个時節，桃園、新竹、苗栗地區个客家人大體都走去種油桐樹，等到日本人無愛摺臺灣人買油桐哩，該兜油桐樹就留下來無分人倒忒，這下大家正有恁多恁靚个油桐花好看呢！逐年，恩兜臨暗仔去看油桐花，慢慢仔天色暗下來，就看毋著桐花咧，毋過，聽講行一段石頭路，到有水、較濕个山谷會有火焰蟲，對從細生長在都市，無看過火焰蟲个僱來講，聽著這消息實在當暢，實在還想愛看火焰蟲喔！

向下行一息仔，再向下行一息仔，過了幾個彎，踏了幾多個石頭路，暗夜肚，恩兜排列仔拉等手共下向下行，「哇，哇，聽著大家驚嘆个聲，正經係滿山滿谷个火焰蟲，哇，還靚喔！哇，仰有恁多恁多火焰蟲……」，實在當多火焰蟲，大家目金金看等，面頂底下、頭前後背、左片正片，哪仔都有，就在恩兜脣項，行較兼兜仔，有成時火焰蟲還會停在恩个身體項，僱會毋盼得分佢飛走呢！企在恁多火焰蟲个中央正經當快樂，大家都笑微微仔，有一種講毋出个感動呢！

飛到手巴掌面頂个火焰蟲，就像會壞忒个舊電火球共樣，迷迷糊糊个昏黃色，定定仔飛過來飛過去，佢兜个生命雖然短暫，續也帶分恩兜當多快樂，還得人惜个小小火焰蟲，滿山滿谷个小小火焰蟲，飛到這片、飛到該片，又像小燈籠共樣，帶分老老嫩嫩恁多歡喜恁多快樂，逐擺都分僱帶等滄滄个快樂摺滿足，緊向上行緊快樂个講：「恁得人惜个火焰蟲再見。」，若係你在脣項，你定著會同僱共下講：「火焰蟲再見，明年再見。」

大自然帶分恩兜个快樂摺感動，實在係講毋忒，一直到這下，逐年四、五月个時節，僱都會摺親戚、朋友，大家共下去大山背遠寮，看緊來緊靚个油桐花、看黃橙黃橙个火焰蟲，佢兜就像恩个好朋友，逐年這個時節都在該等恩兜，一年一擺个約定，也一直放在僱心肝肚。摺大自然交朋友、摺大家分享，共下親近大自然个快樂，正經係當實在、當真實！

創作理念

逐年个四、五月，僱都會滿心期待做得去看油桐花摺火焰蟲，特別係摺親戚、朋友共下去遠寮，該種當簡單、自由自在、樂線，當享受个感覺真經係當快樂，逐擺去感受大自然个時節，都分人有當實在、當真實个感受。坐車去遠山、看山看水，無就行路、蹶山都異好，係平時有間个時節當好个休閒活動。

這幾年，恩兜都會把扼開了滄滄个油桐花摺有盡多火焰蟲个逐個放棄日，逐年个這幾個禮拜，大家湊等共下去看花、看火焰蟲，既經變作恩兜共樣个心願。係講有人想愛同恩兜共下去享受恁輕鬆自在个生活，明年个四、五月就愛記得尋時間好好去享受一下喔！有兜感動係自家去過、看著，正會知！

吳衣婷

國立中央大學客家語文研究所

